

讀

通

鑑

論

讀通鑑論卷七

船山遺書二十四

衡陽王夫之譔

明帝

明帝卽位之元年率百官朝於先帝之陵上食奏樂郡國計吏以次占其穀價及民疾苦遂爲定制迨後靈帝時蔡邕從駕上陵見其威儀察其本意歎明帝至孝惻隱之不易奪而古不墓祭之未盡也邕於是乎知通矣夫云古不墓祭所謂古者自周而言之蓋殷禮也孔子於防墓之前泣然流涕曰古不修墓其云古者亦殷禮也孔子殷人也而用殷禮示不忘故也然而泣然流涕則聖人之情亦見

矣殷道尚鬼貴神而賤形禮魂而藏魄故求神以聲坐尸以獻是亦一道也而其弊也流於墨氏之薄葬若通幽明一致而言之過墓而生哀豈非夫人不自已之情哉且夫謂神既離形而形非神墓可無求亦曰魂氣無不之也夫既無不之矣則亦何獨墓之非其所之也朝踐於堂事尸於室祝祭於祔於彼乎於此乎孝子之求親也無定在則墓亦何非其所在始死之設重也瓦缶也既虞而作主也桑栗也土木之與人異類而不親而孝子事之如父母焉以爲神必依有形者以麗而不舍也豈繫形之所藏曾瓦缶桑栗之不若哉墓者委形之藏也孫者委形之化也以

爲非其靈爽之故則皆非故矣以爲形之所委則皆其  
之遺矣事尸之禮以孫爲形之遺而事之如生乃及其形  
之藏而棄之於朽壤乎夫物各依於其類不得其真則以  
類求之形之與神魂之與魄相依不舍以沒世則神如有  
依不違此也審矣孝者生於人子之心者也神之來格者  
思之所成也過墓而有哀愴之情孝生於心而神卽於此  
成焉且也是形也爲人子者寒而溫之暑而清之疾病痾  
癢而抑搔之事之生平一旦而朽壤置之曰有尊形者在  
焉其情恕其道過高而亡實莊也墨也皆嘗以此爲教而  
賊人惻隱之良雖爲殷道自匪殷人何爲效之哉子曰其

或繼周者雖百世可知也損益於禮之中而不傷仁義百世之後王者有作前聖不得而限之矣故曰喪與其易也鬯戚執古禮以求合抑情以就之易之屬也情有所不忍雖古所未有而必伸戚之屬也守章句以師古者又何譏焉

明帝永平三年以左馮翊郭丹爲司徒郡守入爲三公循西漢之制也而尤不待內遷而速拔之以升其後邢穆鮑昱皆以太守踐三公之位其重吏事也甚矣是道也以獎郡守使勸進於治理重其權而使安於其職則得也若以善三公之選則有不貴於此者何也道者事之綱也天下

者郡之積也。卽事而治之，目與綱並舉而不可有遺。卽道而統之，舉其綱而不得復察其目。此郡守三公詳簡之殊也。以郡守纖悉必察之能贊君道而攝大綱，則瑣細而虧其大者多矣。五方之政剛柔之性異於天，饒瘠之產異於地，一郡之利病施於百里以外，則利其病而病其利。郡守之得民也，去其郡之病以興其利，而民心悅矣。遂以槩之於天下，是強山國以舟澤國，以車徒爲病而或足以斃也。然則郡守果賢固未可坐論清宮而平章四海，況乎名之所自成實之所自損。黃霸之賢且以鴝雀之欺爲鼎足，差況不能如霸者而遽以宗社託之乎？是則且郡守而夕三

公廟堂無廣大從容之化其弊也飾文崇法以傷和平正直之福非細故也明帝勤吏事而不足與於治道未可爲後世擇相法也

宗均去檻穽而九江之虎患息其故易知也人與虎爭而人固不勝矣檻穽者人所與虎爭之具也有所恃而輕與虎遇蹈危而不覺虎與人兩斃之術也均之令曰江淮之有猛獸猶北土之有雞豚謂其繁有而不可使無也常存一多虎於心目而無恃以不恐則自遠其害推此道也以治民之姦可矣故其論治謂文法廉吏不足以止姦亦以雞豚視姦而姦者詘與天下息機而天下之機息也文法

之吏恃文法以與姦競而固不勝廉吏恃廉以弗懼姦  
而姦巧以傷之惟其有恃也而遂謂姦之不足防也乎大  
綱略細法訟魁猾胥不得至於公廷矣奚以病吾民哉均  
之所挾持者固遠矣劉先主諸葛武侯尙申韓而蜀終不  
競包拯海瑞之惜疾尤其不足論者已

楚王英始事浮屠而以反自殺笮融課民盛飾以事浮屠  
而以劫掠死於鋒刃梁武帝捨身事浮屠而以挑禍樂殺  
亡其國邪說暗移人心召禍至烈如此哉浮屠之教以慈  
愍爲用以寂靜爲體以貪嗔癡爲大戒而英融梁武好動  
嗜殺含怒不息迷乎成敗以召禍若與其教相反而禍發



不爽何也夫人之心不移於迹而移於其情量之本也情量一侈反而激之制於此者大潰於彼潰而不可復收矣浮屠之說窮大失居謂可旋天轉地而在其意量之中則惟意所規無不可以得志習其術者侈其心而無名義之可守且其爲教也名爲慈而實忍也髮膚可忍也妻子可忍也君父可忍也情所不容已而急絕之則憤然一決而無所恤矣又其爲說也禁人之欲而無所擇於是謂一飲一食一衣一宿但耽著而無非貪染也至於窮極無厭毒流天下而其爲貪染亦與寸絲粒米之貪同其罪報而無差別則既不能不衣食以爲物累又何憚於窮極之貪饕

而不可爲乎道者則老子揭其旨極其究竟之旨哉  
毀一同而理事皆可無礙心亡罪滅而大惡冰釋暴逆凶  
悖無非夢幻泡影一悟而悉歸於空故學其學者未有不  
駢肩以快於一逞者也桎梏一脫任翱翔於劍鋒虎吻以  
自如一真法界放屠刀出淫坊而卽獲法身操之極而繼  
以縱必然之勢也英何憚而不反融何恤而不掠衍何忌  
而不納叛怒鄰以驅民於鋒刃哉趙閱道張子韶陸子靜  
之不終於惡幸也王欽若張商英黃潛善則已禍人家國  
矣

讓國之義伯夷泰伯爲昭矣子臧季札循是以爲節而漢

人多效之丁鴻逃爵鮑駿責之曰春秋之義不以家事廢  
王事允矣而猶未盡也漢之列侯非商周之諸侯也古之  
諸侯有其國君其民制其治蓋與天子迭爲進退者也君  
道也漢之列侯食租衣稅而無宗社人民之守臣道也君  
制義臣從義從天子之義非己所得制也古之諸侯受之  
始祖天子易位而國自如漢之列侯受之天子天子失天  
下則不得復有其封國非己所得私也何敢以天子之爵  
祿唯己意而讓之也且君子之讓國非徒讓其祿也叔齊  
之賢王季文王之德故伯夷泰伯以保國康民興王制治  
之道德勳名讓之若祿則己所不屑而可以非分之得污

弟爲愛弟乎鴻弟盛而賢也不必侯而可以功名自見也  
如其不能則亦溫飽以終身而已矣祿食者簞食豆羹之  
類也讓者小而受者媿商周之義惡可效之後世乎讀古  
人書欲學之而不因時以立義鮮不失矣子曰以與爾鄰  
里鄉黨乎受列侯之封分祿以與弟斯得矣侯豈鴻所得  
讓者哉

史有溢詞流俗羨焉君子之所不取紀明帝之世百姓殷  
富曰粟斛三十錢使果然也謀國者失其道而民且有餒  
死之憂矣一夫之耕中歲之獲得五十斛止矣古之斛今  
之石也終歲勤勞而僅得千五百錢之利口分租稅徭役出於此

婦子食於此養老養疾死葬婚嫁給於此鹽酪耕具取於此固不足以自活民猶肯竭力以耕乎所謂米斛三十錢者盡天下而皆然乎抑偶一郡國之然而訐傳之也使盡天下而皆然尙常平糴收之以實邊徼以禦水旱而不聽民之狼戾然而必非天下之盡然也則此極其賤而彼猶踴貴當國者宜以次輪移而平之詎使粟死金生成兩賈之苦乎故善爲國者粟常使不多餘於民以啟其輕粟之心而使農日賤農日賤則游民商賈日驕故曰粟貴傷末粟賤傷農傷末之與傷農得失何擇焉太賤之後必有餓殍明帝之世不聞民有餓死之害是以知史之爲溢詞也

雖然亦必有郡國若此者矣故曰謀國者失其道也

廣陵王荆楚王英淮陽王延以逆謀或誅或削夫三王者  
誠狂悖矣乃觀北海王陸遣中大夫入覲大夫欲稱其賢  
而歎曰子危我哉大夫其對以孤聲色狗馬是娛是好乃  
爲相愛則明帝之疑忌殘忍夫亦有以致之也且三王者  
未有如漚興居之弄兵狂逞也緩之無德教之無道愚昧  
無以自安而姦人乘之以告訐則亦惡知當日之獄辭非  
附會而增益之哉楚獄興而虞延以死延以舜之待象者  
望帝意至深厚也而不保其生寒朗曰公卿口雖不言而  
仰屋竊歎則臣民之爲寒心者多矣作圖識事淫祀豈不

可教而必極無將之辟以加之則諸王之寢棘履冰如睦  
所云者善不敢爲而天性之恩幾於絕矣西京之亡非諸  
劉亡之也漢之復興諸劉興之也乃獨於兄弟之間致其  
猜毒而不相舍聞睦之言亦可爲之流涕矣身沒而外戚  
復張有以也夫

班超之於西域戲焉耳矣以三十六人橫行諸國取其君  
欲殺則殺欲禽則禽古今未有奇智神勇而能此者蓋此  
諸國者地狹而兵弱主愚而民散不必智且勇而制之有  
餘也萬里之外孱弱之夷苟且自王實不能踰中國一亭  
長其叛也不足以益匈奴之勢其服也不足以立中夏之

威而吹弱凌寡鹿亂其喙息以詫奇功超不復有人之心  
而今古豔稱之不益動妄人以爲妄乎發穴而攻螻蛄人  
沼而捕鯁鯨曰智之奇勇之神也有識者笑之久矣光武  
閉玉門絕西域班固贊其盛德超固之弟也嘗讀固之遺  
文其往來報超於西域之書述寶憲殷勤之意而羨其遠  
略則超與固非意異而不相謀也其立言也如彼其兄弟  
相獎誣上微幸以取功名也如此弄文墨趨危險者之無  
定情亦至此乎班氏之傾危自叔皮而已然流及婦人而  
辯有餘其才也不如其無才也

章帝



陳湯幸郅支之捷傳介子微樓蘭之功漢廷議者欲絀而勿錄可矣介子湯無所受命私行以微幸旣已遂其所圖而又獎之則妄微生事之風長而邊釁日開若第五倫之欲棄耿恭也則無謂矣恭之屯車師也竇憲奏遣之明帝命之金蒲城者漢所授恭使守者也車師叛匈奴驕圍之經年誘以重利脅以必死而恭不降車師之屯其當與否非事後所可歸咎於恭也恭所守者先帝之命所持者漢廷之節死而不易其心斯不亦忠臣之操乎車師可勿屯而恭必不可棄明矣倫獨非人臣子與而視忠於君者如芒刺之欲去體何也鮑昱之議是已然猶未及於先帝之

命也山陵無宿草急疾而委其銜命之臣於原野思對君父以寄其惡怒於孤臣倫之心路人知之矣倫之操行矯異無孝友和順之天良自其薄待從兄以立名而已然是詎足爲天子之大臣乎

三年無改於父之道道者剛柔質文之謂也剛柔質文皆道之用也相資以相成而相勝以相節則極重而必改相制而抑以相生消息之用存乎其閒非卽有安危存亡之大則俟之三年而非需滯於是而孝子之心遂國事亦不以相激而又墮於偏明帝之明察誠有過者而天下初定民不知法則其嚴也乃使後人可得而寬者也章帝初立

鮑昱陳寵急橋先君之過第五倫起而持之視明帝若胡  
亥之慘而已爲漢高章帝聽而速改焉將不得復爲人子  
矣人君當嗣位之初其聽言也尤不容不慎也臣下各懷  
其志於先君之世而或不得逞先君沒積憤懣以求伸遂  
若魚之脫於鉤而唯其洋洋以自得斯情也名爲謀國而  
實挾怨懟君父之心幸其死以鳴豫者也爲人子者柰何  
其殉之且君而尙寬弛與則人臣未有不悅矣君而尙嚴  
察與則人臣未有不怨矣故察吏治精考覈修刑典皆臣  
下之所大不利焉者幸先君之沒屬望於新君解散法紀  
以遂其優游嘖有煩言無所顧忌立心若此而殉之以干

臣民之譽過聽之病成乎忘親而可不慎哉明帝之過於  
明察也非法外而加虔劉如胡亥之爲也盡法而無欽恤  
之心耳其法是其情則過其情過其法固是也卽令大獄  
之興懼於囚隸者有迫待矜釋者焉章帝自得以意爲節  
宜姑卽事而貸之漸使向寬以待他日則先帝之失不章  
嗣君之孝不損而臣民之禁忌樂育亦從容調變以適於  
中無或驟釋其銜勒以趨於痿痺俾姦宄探朝廷之意旨  
以罔戒於吞舟今陳寵之言曰蕩滌煩苛之法帝之詔曰  
進柔良理冤獄皆唯亟反明帝以表異君若臣相勸於縱  
弛一激一反國事幾何而不亂哉故剛柔文質道原竝建

而大中卽寓其間因其剛而柔存焉因其文而質立焉有道者之所尙也懷忿懟而遽更張之如攻仇讎如救暴亂大快於一時求逞而不忌其弊也又相反而流以爲天下蠱爲此說者佞人也明主之所放流者也此道不明唐宋以降爲君子者矯先君之枉以爲忠孝他日人更矯之一激一隨法紀亂朋黨興國因以敝然後知三年無改之論聖人以示子道也而君道亦莫過焉矣

稱母后之賢至明德馬后而古今無異詞讀其詔若將使人涕下者后蓋好名而巧於言者也建初二年大旱言者以爲不封外戚之故姦人邪說言之而罔所媿忌亦至此

哉夫人不從上之言而窺上之心以爲從久矣言者  
媿忌有致之者也章帝屢欲封諸舅后屢卻之受封已定  
復有萬年長恨之語人皆以謂封諸馬者章帝強爲之非  
后意也乃后沒未幾奏馬防兄弟奢侈踰僭悉免就國且  
有死於考掠者同此有司而與大旱請封之奏邈不相蒙  
也姦人反覆以窺上意則昔之請封爲后之所欲後之劾  
治爲章帝之所積憤而欲逞明矣是以知帝之強封諸舅  
陽違后旨而實不獲已以徇母之私也車騎之盛丁甯戒  
責而操國之兵柄討羌以爲封侯地第五倫爭之而不克  
兵柄在握大功旣建復飾恭儉以要譽此王莽之故智后

所屬望於諸馬者將在是乎東京外戚之害遂終漢世而國繇以亡自馬氏始后爲之也故言不足以徵心譽不足以考實馬后好名而名成工於言而言傳允矣其爲哲婦矣哲婦之尤當時不覺後世且不知焉以欺世而有餘可不畏哉

論守令之賢曰清慎勤三者修而守令之道盡矣乎夫三者報政以優令名以立求守令之賢未有能置焉者也雖然持之以爲標準而矜之以爲風裁則民之傷者多而俗以詭國亦以不康矜其清則待物也必刻矜其慎則察物也必細矜其勤則求物也必煩夫君子之清清以和君子

之慎慎以簡君子之勤勤以敬其事而無位外之矜於己  
不泥非盡天下而使嚴於簞豆也於令不妄非拘文法而  
求盡於一切也於心不逸非顛倒雞鳴之衣裳以使人從  
我而不息也君子修此三者以宜民而善俗用宰天下可  
矣然而課政或有所不逮而譽望減焉名實之相詭久矣  
第五倫言陳畱令劉豫冠軍令駟協務爲嚴苦吏民愁怨  
議者反以爲能謂此也使豫與協不銜其曲廉小謹勤勞  
之跡豈有予之以能名者欲矯行以立官坊而不學則三  
者之蔽民愁而俗詭故曰君子學道則愛人弦歌興而允  
爲民父母豈僅恃三者哉



納諫之道亦不易矣君無爵賞以勸之則言者不進以爵  
賞勸之言者抑不擇而進故納諫難也抑有道於此士之  
有見於道而思以匡君者非以言讎爵賞也期於行而已  
矣故明君行士之言卽所以報士而爵賞不與焉子曰君  
子不以言舉人此之謂與且夫進言者繩君之愆而匡之  
則言雖未工而知其爲忠直之士心識其人而以爵賞繼  
其後其失焉者鮮矣若夫所言者求羣臣之得失而抑揚  
之取政事之沿革而敷陳之其言允洵可行矣而人之賢  
不肖未可知也此而以爵賞酬焉則佞人雜進而奚保其  
終哉抑其言是矣其人非不肖矣因其言之不諱而置之

左右使旦夕納諍焉上既唯言是取人  
欲終其敢言之名於是吹求在位者無已而毛  
廢興以爲言資將有事止於此而言且引之以無窮非  
而斥之姦非賢而獎之賢事不可廢而欲已之事不可興  
而欲行之荒唐苛細之論皆以塞言之責而國是亂故言  
者可使言也未可使盡言也可使盡言也不可使引伸爲  
無已之言也斟酌之權在乎主心樂聞諫而不導人以口  
給爵賞之酬其可輕乎哉章帝於直言極諫之士補外吏  
而試其爲非無以酬之而不引之以無涯之辯官守在而  
賢不肖抑可徵焉庶幾得之

與賢者在於得人與子者定於立嫡立嫡者家天下一定之法也雖然嫡子不必賢則無以君天下而保其宗祏故必有豫教之道以維持而不卽於咎太甲顛覆典刑而終遷仁義以伊尹也乃夫人氣質之不齊則固有左伊尹右周公而不能革其惡者和嶠困於晉惠帝之愚而教且窮故漢元晉武守立適之法卒以亡國則知適子之不可教而易之以安宗社亦詎不可古之人何弗慮而守一成之例以不通其變乎君子所垂法以與萬世同守者大經而已天下雖危宗社雖亡亦可聽之天命而安之何也擇子之說行則後世暱寵嬖而易元良爲亡國敗家之本皆託

之以濟其私君子不敢以一時之利害啓無窮之亂明道  
盡而固可無憂也光武以郭后失寵而廢太子疆羣臣莫  
敢爭者幸而明帝之賢得以揜光武之過而法之不臧禍  
發於異世故章帝廢慶立肇而羣臣亦無敢爭焉嗚呼肇  
之賢不肖且勿論也章帝崩肇甫十歲而嗣大位欲不倒  
太阿以授之婦人而不能終漢之世冲質蠡吾解瀆皆以  
童昏嗣立權臣哲婦貪幼少之尸位以唯其所爲而東漢  
無一日之治此其禍章帝始之而實光武貽之也故立適  
與豫教並行而君父之道盡過此以往天也非人之所能  
爲也而又奚容億計哉

不測之恩威無常經謀略之士所務也謂足以震人於非  
所期而莫敢不服雖然豈足恃哉張紆守隴西羌人反其  
酋號吾首亂入寇追而生得之紆釋之遣歸已而迷吾寇  
金城塞紆與戰敗之迷吾將人眾詣臨羌納降紆以毒酒  
殺之戰而獲則釋之降而來則殺之紆以是爲不測之恩  
威也於是而羌禍之延於秦隴者幾百年而後定一生一  
殺不可測者如是也彼將何據以爲順逆之從哉戰而禽  
禽而釋何憚乎不戰勝可以逞敗猶可以生也降而來來  
而殺何利乎降降而必死不如戰而得生其不決計相尋  
於死鬪者鮮矣故恩威者必有準者也在己可白而在物

可信也感其恩者不渝畏其威者不可犯乃以服天下而莫敢不服尙勿輕言不測哉

西漢之衰自元帝始未盡然也東漢之衰自章帝始人莫之察也元帝之失以柔而章帝滋甚王氏之禍非元帝啓之帝崩而王氏始張竇憲之橫章帝實使之然矣第五倫言之而不聽貴主訟之怒形於言不須臾而解周紆忤竇篤而送詔獄鄧綏以死諫知其忠問其疾而終不能用若此者與元帝之處蕭張宏石者無以異而元帝之柔柔以已也章帝之柔柔以宮闈外戚也章帝滋甚矣託仁厚而溺於牀第終漢之世顧越於婦家以進姦雄而隕大命帝

惡能辭其咎哉曹子桓曰明帝察察章帝長者爲長者於婦人姻婭之間脂韋囁呪以解乾綱惡在其爲長者哉范滂稱帝之承馬后也盡心孝道乃合初終以觀之帝亦惡能孝邪馬后崩未幾而馬氏被譴有考擊以死者矣是其始之欲封諸舅后辭而不得也非厚舅氏也面柔於馬后之前而曲順其不言之隱也其終之廢馬氏於一旦也非忘母恩也竇氏欲奪其權而柔於哲婦之前而替母黨以崇妻黨也於母氏柔也於諸父昆弟柔也於牀闥柔也於戚里柔也於臣民柔也於罪咎柔也雖於忠直之士柔也亦無異於以柔待頑讒者也柄下移而外戚宦寺情恩以

選和安二帝無成帝之淫昏而漢終不振章帝之失豈在  
元帝下哉

明帝車駕屢出歷充并冀豫徐荆之域章帝踵之天下不  
聞以病告然天下亦惡能不病哉供億有禁窺探有禁踐  
蹂有禁能禁者乘輿也不能盡禁者從官也不可必禁者  
軍旅也臺隸也天下惡能不病也天子時出巡游則吏畏  
覺察而飾治治可舉矣乃使果有循吏於此舉大綱而緩  
細目從容以綦平治而廢者未能卒興且無以酬天子之  
省視於是巧宦以逃責者抑將緣飾其末而置其本以徒  
擾吏民天下惡能不病也光武之明以立法二帝之賢以



繼治豈繁不念此而樂爲馳驅以病民者何也光武承亂  
而興天下盜賊蠡起已亦繇之以成大業故重有疑焉冀  
以躬親閱歷補罅整紛而銷姦桀之心以是爲建威銷萌  
之大計焉耳乃國用耗於芻糧小民狎其舉動羌禍一起  
軍興不給張伯路一呼於草澤數年而不解蔓延相踵垂  
及黃巾之起而漢遂亡盜賊橫行以喪天下前此未有而  
自漢始之然則厚疑天下而恃目擊足履以釋憂徒爲召  
憂之媒亦何益乎有虞氏五載一巡守歲不給於道途所  
謂盡信書則不如無書也周制十有二年王乃時巡歷三  
傳而昭王以死四傳而穆王以荒封建之世天子之治止

千里之畿則有暇以及遠五服之君各專刑賞之柄則遠  
制而不能然且非虞舜成王而利不償害況以一人統天  
下而耳目易窮自非廓然大公推誠以聽監司郡縣之治  
未有能肖天下之險阻者也又況樂酒從禽遊觀無度如  
順桓二帝之資以爲口實哉

和帝

議者曰夷狄相攻中國之利誰爲此言者以貽禍於無窮  
矣鄧訓力破浮議保護諸胡免於羌難羣胡悅從訓乃專  
力以攻迷唐而迷唐遠竄智矣哉楚莊吞舒蓼而後滅陳  
破鄭敗晉於邲夫差棲越於會稽而後大敗齊師脅晉於

黃池冒頓破東胡而後困高帝於平城苻堅吞慕容捲河西而後大舉以寇晉蒙古滅金滅夏西收欽察畏吾兒南收六詔而後舉襄樊以亡宋夷狄之起也恆先并其醜類而後及於中國中國偷庸之士猶且曰夷狄相攻吾利也地益廣人益眾合眾小而成一大猶疥癬之毒聚爲一癰也屢勝之氣益壯習於攻擊之術益熟得利而其願益奢我且鼯鼯自得以爲虎鬪於穴而不暇及於牧廐也禍一發而不可收矣善制夷者力足以相及則撫其弱抑其彊以恩樹援以威制暴計之上也力不足以相及聞其相攻也而憂之修城堡繕甲兵積芻糧任將訓卒以防其突出

策之次也聽其蹄齧以增其盛幸不我及以緩旦夕之禍  
坐繫之術也其尤烈者激之獎之助之以收兼弱拾殘之  
餘利不知戎心之熟視我吭而思扼之也悲夫庸人一言  
而□千□有如是夫

南單于降漢光武置之西河塞內迨和帝之世竇憲出塞  
五千里大破北匈奴北單于逃亡其餘種於除鞬請立袁  
安任隗欲乘朔漠之定令南單于反北庭驅逐於除鞬而  
安其故慮此萬世之長策也於除鞬不得立而漢亡一敵  
送南匈奴反北庭統一匈奴而南單于抑且以爲恩乃若  
陽以施大德於南虜而陰以除中國腹心之蠹戎心不啓

戎氣不驕夷風不淫於諸夏判然內外之防無改於頭曼  
以前之舊劉淵石勒之禍惡從而起哉夷狄闌居塞內狎  
玩中國而窺閑乘弱以恣寇攘必矣其寇攘也抑必資中  
國之姦宄以爲羽翼而後足以逞使與民雜居而禍烈矣  
尤不但此也民之易動於曠悍習淫苟簡喙息而畏禮法  
之檢束亦太化之流所易決而難防也古之聖王憂之切  
故正其氏族別其婚姻域其都鄙制其風俗維持之使若  
其性而民之愚也未能安於嚮化而利行之也廉恥存風  
俗正雖有不利而因不忍於禽行以不容於鄉黨□□入  
而雜處焉必且與之相市易矣必將與之相交遊矣浸乃

與之結昏姻矣其衣其食其寢處其男女蓋有與愚不肖  
之民甘醉飽使馳逐而相得者矣彼惡知五帝三王之前  
民之歸屬棄捐與禽獸伍而莫保其存亡之命者固若此  
也則且詫爲新奇大利於人情而非毀五帝三王之爲贊  
疵然而彊力不若也安忍僥利不若也則君之宗之樂奉  
而率從之而不知元后父母之必就吾同類而戴以德乘  
時之一人矣女奚之釀也必擇其酸醅而去之惡其引旨  
酒而酸之也慈父之教也必禁其淫朋而絕之惡其引樸  
子而胥淫也禍莫重於相引而相害者爲輕害知禦引不  
知避也於是而知袁安任隗之識遠矣其言曰光武招懷

南單于非謂可永安內地正以權計之算并禦北狄夫光武豈可謂之權哉倒置重輕而滅五帝三王之大經也孝和之世袁安任隗丁鴻爲三公何敞韓稜爲尙書皆智勇深沈可與安國家者也竇憲之黨謀危社稷帝陰知而欲除之莫能接大臣與謀不得已而委之鄭眾宦寺之亡漢自此始非和帝寵刑人疏賢士大夫之咎也微鄭眾帝其危矣撥所自始其開自光武乎崇三公之位而削其權大臣不相親也授尙書以政而卑其秩近臣不自固也故竇憲緣之制和帝不得與內外臣僚相親而唯與閹宦居非憲能創錮蔽之法以鉗天子與大臣也其家法有舊矣

三公堅持匈奴之議而不能違憲之討虜權輕則固莫能  
主也尚書鄧禹抗竇憲而自殺則誅賞待命於權臣也西  
漢之亡也張禹孔光懸命於王氏之手而宗社移矣光武  
弗知懲焉厚其疑於非所疑者使沖人孤立於上而權臣  
制之不委心膺於刑人將誰委乎明主一懷疑而亂以十  
世疑之滅德甚矣哉創業之主而委任大臣非僅爲己計  
也英敏有餘攬大政於一心而濟之以勤可獨任矣大臣  
或有二端之欺己而遂厚致其疑然其疑君子也必不  
信小人君子且疑而小人愈懼此豈可以望深宮頤養中  
材以下之子孫乎公輔無權中主不勝其勞而代言之臣



重代言之臣秩卑不得與坐論而親展坐則秉筆之宦寺持權禍亂之興莫挽其流矣天下皆可疑胡獨不疑吾子孫之智不逮而歷於宴安也乎當其始也大臣與宦寺猶相與爲二也朝綱立而士節未墮則習尙猶端而邪正不相爲偕若袁安任隗丁鴻者雖憂時莫能自效而必不攀鄭眾以有爲事不求可功不求成自靖以聽天而不假枉尋以直尺故鄭眾雖有成勞而尙存檢押迨及君臣道隔宦寺勢成大臣之欲匡君而衛國者且紹介之以行其志而後宦寺益張而無所忌楊一清因張永以誅劉瑾楊漣且不得不左袒王安以抑魏忠賢則忠端之大臣不能絕

以有爲又惡能禁小人之媚奄腐哉尚拱張居  
廢興一繫於焉保之榮落上失其道下莫能自主禍始於  
東漢而流毒萬年不亦惜乎

朋黨之興其始於竇憲之誅乎霍氏之敗也止其族類之  
同惡者而不及其餘王莽篡而伏誅王閔其族子而免他  
勿論已竇憲之卽法也竇篤竇景郭璜鄧疊之同惡誅之  
可也宋繇以大臣而與比罷之可也班固之怙勢而橫竄  
之可也盡舉其宗族賓客名之以黨收捕考治之黨之名  
立而黨禍遂延於後世君子以之窮治小人小人卽以之  
反噬君子一廢一興刑賞聽人情之報復而人主莫能尸

焉漢唐以還危亡不救皆此之繇也可不悲乎子曰唯上知與下愚不移然則中材之可移者多矣無所慕而好善無所懲而惡不善中心安仁者天下之一人也出而欲仕仕而欲速非能擇惡而遠之抑非必擇善而忌之也人主不能正於上大臣不能持於下授姦邪以奔走天下之柄使陷於惡無抑內媿於心乎捐廉恥迷禍敗徼一旦之利祿以蹈於水火仁人所哀矜而不以得情爲喜者也錮之以黨而蹙之以窮年實繁有徒亦且聚族延頸待國事之非而乘之復起迨其後也憤毒積而善類之死生縣於其手而唯其斬艾國亡人而人亡國自臣子之迭相衰王釀

之而君亦且無如之何此抑可爲痛哭者矣邪黨之依附  
者戚里也宦寺也宮闈也乃陳蕃之死以竇武亦戚里也  
司馬呂范之貶以宦寺亦宮闈也楊左之殺以王安亦宦  
寺也彼小人者亦何不可借戚里宮闈宦寺之名以加君  
乎哉子曰舉直錯諸枉能使枉者直枉者直則直用之奚  
黨之有乎舜之所誅者其驩耳而告司徒曰敬敷五教在  
寬中材之士不絕其利祿之徑而又滌除其僉佞之名亦  
何爲不濯磨以自新邪張酺曰憲等寵貴羣臣阿附唯恐  
不及言憲懷伊呂之忠比鄧夫人於文母嚴威旣行皆言  
當死不顧其前後以此思之君失道於上大臣失制於前

使人心搖搖靡定行不顧言言不顧心如飲之狂藥而責其狂狂可惡而飲之藥者能勿疚乎君子當思有以處之矣定國者一人非天下之自能定也憤燕邪之馳騁快誅殲於一朝博流俗之踴躍其反也還以自戕而戕國捶鐵者戒其反覆任人之宗社會愛鐵之不若而亟反亟覆以折之也

章帝命曹褒制漢禮不參羣議斷自上裁而褒雜引五經旁及讖緯以成之和帝之加元服亦既用之矣張酺奏褒擅制破亂聖術而廢之褒所定禮遂不傳於世亦可惜矣褒之引讖緯以定彝典其說今聞見於鄭元如號上帝以

釋義之類誠陋矣若其雜引五經以參同異者初未嘗  
失而一以專家保殘之學屈公義以伸其私說其不能通  
於吉凶哀樂之大用也庸愈乎秦廢三代之彝典制氏戴  
氏后氏僅傳其一曲而不可通之於他未可執也且卽其  
存者而猶有不可執者焉子曰殷因於夏禮所損益可知  
也因者仁義之蘊中和之藏彝倫之敘耳夏殷周治法相  
仍而猶隨時以損益況郡縣之天下迥異於三代者哉卽  
以彝倫之不易者言之父子均也而漢唐無自出之帝不  
可強立王侯無社稷之守長子之喪不當上視君父君臣  
均也而令之於守掾屬之於守令國相長史之於侯王生

殺廢置統於天子令其之誼自異於三代侯國之臣兄弟  
均也侯王無國公卿不世孝秀登朝士農迭爲興廢宗子  
不得獨尊支庶不得終賤夫婦均也同姓而婚姻不通乃  
同一姓而所出者異周齊楚鄭之各有王氏非本支也周  
宗之支周魯滕邢孟仲臧南固同姓也禁異出而不禁同  
祖非其本矣秦獎節婦而出妻再適不齒於人倫舅姑視  
父母以正家綱而答拜之儀且適驕其悍婦然則彝倫之  
損益得五經之精意而無嫌於損益多矣他如覲聘之禮  
田獵之制相見之儀饋贈之節郡縣行之而情固不浹事  
固不治是必通變以審天則窮理以察物宜曲體乎幽明

之故則酌乎哀樂之原使賢者可就不可就而後居之  
以辨禽獸而建中和之極川錫萬民固必參五經之大義  
微言以出入會通而善其損益雖或有過焉可俟後之作  
者繼起而改之可勿慮也若夫專家之學守其故常執聞  
見而迷其精意亦惡足尚哉褒之禮吾知其必有疵也雖  
然吾知其必有得也應劭蔡邕之所傳語而不詳永嘉之  
後夷禮雜附而天道人事終於昏翳惜哉使褒之禮而傳  
也辨其失存其得考其異驗其同後之人猶有徵焉張酺  
以迂執之說致其湮沒是亦古今之大缺陷矣自宋以後  
律呂毀而九宮之淫樂興冠冕廢而袍韡之□服濫九獻



而而酌酒之野祭行乃至郭守敬以介然之類明廢麻元  
而棄天紀徑以爲直便以爲利人之且淪於□□也悲夫  
東漢不任三公三公因不足任上失御而下遂偷也劉方  
張奮亦有名興自致大位矣乃於和帝之世因仍章帝之  
柔緩弗能有補所詫爲敢言者爲梁氏報怨吹求竇氏以  
迎帝之私情而已亂先帝夫婦之倫逢嗣君寡恩之惡舍  
舊趨新犯神人之怨恫而樹援於后族是尙足爲天子之  
大臣乎帝手詔曰恩不忍離義不忍虧三公讀此而不媿  
以死非人也夫當竇后生存之日竇景橫逆何弗一言匡  
救而必待后之死乃踐蹂之如斯其酷耶竇替梁興而東

漢遂大亂三公爲宮閹妬爭之吠犬而廉恥掃地  
之不肖抑漢以論道之職爲養尊處優之餘食贅形休戚  
不相其而無以勸之也則光武作法之涼不能謝咎矣  
班超之告任尙曰塞外吏士本非孝子順孫皆以罪過徒  
補邊屯宜蕩佚簡易寬小過總大綱此後世將兵之善術  
也然繇此而言兵者難矣嚴之則兵心離而無與效死寬  
之則恣其驕暴而以病民故曰難也三代卽民卽兵井甸  
之賦師還而仍爲鄉鄰將雖寬而兵自不爲民害故師之  
象曰容民畜眾寬而無損也後世之兵出於召募類皆貪  
酒嗜色穢穢淫酗之民容者所不能容畜者所不易畜也

其不禁而兵爲民害久矣然而三代之兵不敢暴於其國而諸侯相競於侵伐則出疆而斬木堙井俘虜掠奪有所不禁後世所與出塞之士彌望而皆茅葦逐盜之兵所克皆爲內地守法而不內侵則飢渴暴露生之不保而況有所利乎然則三代兵不毒民但不毒乎國中而自有餘逞故後世之言兵者倍爲難也無已則唯達其貪饕淫蕩之情重其饕餮椎牛酤酒優裕有餘而後可持法而嚴以馭之而民其不病矣乎乃將之嚴也尤惡其矜名而邀士大夫之譽也有恤民之心而矜惠民之名法浮於情而足以召怨無恤民之實而徒徇清市德斯刈壯士以要盈廷之

薦刻求兵之以驅命報斗筭之粟欲其弗鳥獸散也其可得乎故獲市井小民之歌頌者必潰之將也得學士大夫之稱說者必敗之將也多其兵而寡其食必亡之國也以名求將而不以功授將帥殿最之權於清議者必亂之政也厚以養之簡以御之弗與民雜處而殊之屯聚之於邊陲而與民相忘以安之庶幾乎民無所施其恩怨士大夫無所容其毀譽爲將者坦然任意以斟酌其恩威而後兵可得而用也故曰難也

闢異端者學者之任治道之本也乃所謂異端者詭天地之經叛先王之憲離析六經之微言以誣心性而毀大義

者也。非文辭章句。度數沿革之小。有合離偏見。小聞所未聞。而見爲異者也。六經當秦火之餘。非漢儒則愈亡。邈不可謂無功。而專家以相競。不可謂無罪。善求益者。樂取其所未及。以徵所已及。麗澤竝行。競流以相度。越而匯於大川。朋友講習之功。所爲取諸兌也。見善而遷。如風之下流。如雷之相應。而十朋之龜。弗克違。所爲取諸益也。漢之諸儒。各有師傅。所傳者皆聖人之道。所散見也。而習氣相沿。保其專家。以相攻擊。非其所授受者。謂之異端。天子聽其說。而爲之禁。不已陋與。徐防位三公。天子所與論道者也。道論定。而爲天下則乃首所建白。禁博士弟子之意。說坐。

以不修家法之罪離析聖道銅蔽後起之聰明精義隨而  
浮文昌道之不亡也幾何哉宋承其弊蘇王二氏之學遂  
爲廢興而詖淫以逞延及於今經義取士各有師承舉師  
腐士拾殘瀦以爲密藏曾不知心爲何用性爲何體三王  
起於何族五霸興於何世畫地爲獄徵繆不解非是者謂  
之破裂文體因而狂迷之士請以雌黃帖括沈埋烟霧之  
老生從祀先師世教衰正學毀求斯人之弗化爲□物也  
惡可得哉

善言天者驗於人未聞善言人者之驗於天也宜於事之  
謂理順於物之謂化理化天也事物人也無以知天於事

物知之爾知事物者心也心者性之靈天之則也漢儒言  
治理之得失一取驗於七政五行之災祥順逆合者偶合  
也不合者挾私意以相附會而邪妄違天無所不至矣和  
帝之世正陽之月日有食之有司無以塞咎舉而歸之兄  
弟諸王留京師之應嗚呼天其欲使人主絕毛裏之恩蔑  
鞠子之哀忍忤以逞陽剛之威箠乎亡周者六國彊秦魯  
衛終安其分亡漢者前有王莽後有袁曹孫氏而先主猶  
延其祀亡魏者司馬亡晉者劉裕亡唐者朱溫又降而孤  
立無援□類乘而滅之兄弟何尤焉當和帝時宗支外  
戚張此正所謂陰逼天位離火下燔明夷之世也而顧責

之天子僅有之兄弟讀和帝之詔有人之心者不禁其潛  
然泣下矣妄人逞妖誣之辭援天以制人主賊仁戕義而  
削社稷之衛乃至此哉夫日食有常度而值其下者蒙其  
咎抑惟懲懲思過以避陰陽之沴反諸心徵諸事察諸物  
無往而不用其修省惡可以一端測哉雖億中不足取也  
況其妄焉者乎

安帝

漢書附

司馬遷有言伯夷雖賢得孔子而名益著吾於泰伯亦云  
三代以下不乏賢者而無與著賢不著而民不興行世無  
有師聖人樂善之心者也漢清河王慶其賢矣夫慶之廢



章帝之私也慶廢而安於廢母以誣死而不怨怡然與和  
帝相友愛而篤其敬寶后沒和帝崇梁氏之禮慶垂涕念  
母欲求作祠堂而守禮不敢言和帝崩立強裸之子於民  
閒而無所窺望庶幾乎知命而安土以敦仁者乎當東漢  
時兄弟以相讓爲誼劉愷丁鴻皆聞東海王彊之風以起  
然而逃匿頗沛效伯夷泰伯而徇其迹則謂之好名非苛  
也慶從容於章和之世悍后之旁優游輦轂徐就藩封執  
臣禮而處之若忘德彌隱志彌深禮彌謹行彌庸其不膺  
至德之稱天下後世無有師聖人樂善之心爲心者也慶  
之所爲亦可謂民無得而稱矣東海王之安於廢也母氏

固存而不失其尊養也然且山陽王荆假之以稱亂無抑  
強有可乘之間而荆乘之安帝以赤子卧天下之上而無  
有撻慶以起者慶有以弭之也非強之所能逮也唐宋王  
成器委順於元宗之世其近之矣乃元宗以戡亂之大功  
雖嗣睿宗而若其自致成器固不敢干非若慶之以私愛  
相妨而坐廢成器雖不爭豈能望慶之項背乎三代以下  
未嘗無賢也人不知也殤帝天慶子祐終嗣天位人所不  
知天佑之矣

延平之詔曰郡縣欲獲豐穰之譽多張墾田競增戶口不  
媿於天不畏於人自今以後將糾其罪庶幾乎仁者之怒

矣墾田之不足爲守令功不待再思而知也田蕪而思墾之民之不能一夕安寢而忘焉者而特力不足耳其能墾與吏雖竄不能奪也其不能墾矣吏雖勤不能勸也病而不甘食者慈父不能得之於子無亦防其強食而噎焉耳必欲勸之墾也則無如任其墾而姑不以聞之縣官也張墾田而民愈不敢墾欺天罔人毒流原野而田終以蕪國終以貧此孝宣之世竊循吏之名者禍之所延而貪君利之糾以罰而害其弭乎若夫戶口之增其爲欺謾也尤甚春秋戰國之世列國爭民以相傾則以小惠誘鄰國之民而歸己國遂以彊非四海平康之道也郡縣之天下生齒

止於其數人非茂草灌木蹶然而生實於此者虛於彼  
鴻偶有所集哀鳴更苦非可藉爲土著也曷抑問所從來  
而知增者之爲耗乎不然抑將析人父子兄弟而賦及老  
稚虐莫甚焉貪君以爲利酷吏以爲名讀延平之詔知章  
和之世守令之賊民以邀賞者多矣張伯路之援棘矜而  
起非一朝一夕之故也

□□□未有不亂者也鄧后之視馬后也爲尤賢馬后  
賢以名鄧后較有實矣厚清河王慶而立其子詔有司檢  
數鄧氏家門非過遺鄧騭兄弟還第皆實也宜乎其賢無  
以愈也然而聽政十年國用不足至於鬻爵張伯路起於

內羌叛於外三輔流亡天下大困非后致之而孰使然邪  
蓋后之得賢名者小物之儉約小節之退讓而已此里婦  
之炫其修謹者也所見所聞不出閨闈其擇賢辨不肖審  
是非度利害一唯瑣瑣姻亞之是庸故任尙屢敗而不黜  
一得罪於鄧氏而死不旋踵徒民蹙地唯鄧隲之意而人  
不能爭其尤忤害者杜根成翊世進歸政之諫而撲殺於  
廷則擅國睚私糜國於無名之費以空國計人不得而知  
者多矣張禹尹勤梁鮪徐防張敞李脩司馬苞馬英皆以  
庸劣之才取容鄧氏而致三公袁敞錚錚而早不能容則  
崇佞替忠上下相蒙以釀亂而不自覺者多矣嗚呼后之

始立以賢名后之終總大政以賢著于愚賤之譽而蠶隱  
於中蝕木不覺陰始疑而履霜亦孰知堅冰之至哉故樊  
□賢者非良史之辭也事□□者非□□之節也司馬溫  
公歷鑒於漢唐而戴□□□以行其志佞者爲之說曰毋  
改子道豈非過乎

利之所在害之所興抑之已極其縱必甚故屈伸相感而  
利生情僞相感而害起屈伸利害之相爲往復而防之於  
早以無不利智者知之明也而庸愚不知知者則立法以  
遠害不知則徇利以致凶利害之樞機在此矣永元之後  
降羌布在郡縣爲吏民豪右所徭役積以愁怨及迎段禧

之役徵發羌騎諸羌犇潰因結聚入寇而隴右三輔并益  
皆殘殺破敗內亂乘之漢因以衰制之不早火鬱極而燎  
原屈伸必然之數也中國之智以小慧制戎狄戎狄之智  
以大險覆中國中國之得勢而驕則巧以漁其財力戎狄  
之得勢而逞則很以恣其殺掠此小勝而大不勝之固然  
也役其力聽役矣侵其財聽侵矣債帥墨吏猾胥豪民施  
吏民而使勿虐之者下策也貪猾者幸快其須臾之意欲  
刑罰非所畏也或且獻其佞說曰何事苦吾民以獎異類  
如汲黯之言矣方可役財可侵大險之伏不敵小慧貪猾

者何知近取股掌而弗利之邪迨及鬱極而燻蒙其利者  
死骨已朽而後生食報於毒亦痛矣哉故王者之於戎狄  
暴則懲之順則遠之各安其所我不爾侵而後爾不我虐  
旅獒之戒白雉之卻聖人之慮非中主具臣所測也

賞以春夏刑以秋冬賞者封國受爵之錫命也刑者五刑  
大辟之卽市也天有恆經王有恆政順天以不違其溫肅  
之氣王道之精微也而夷狄盜賊之主逞喜怒而不爲之  
節則干天而傷民然其爲義止此而已進忠賢者引之若  
不及賞軍功者勸之使復効秋冬不舉萬一溢先朝露王  
者之心惻矣賢者功臣之心亦沮矣若夫聽訟斷獄易固



曰明慎用刑而不留獄留獄者法之所爲大擾也留以俟  
秋冬而在者直者交困於心而不能釋怨且繇是而深而  
變計滋起矣且其留而待時也將拘禁之與微纒叢棘之  
苦劇於笞杖逮連證佐浸以賄而游移其初心若縱之與  
自知不免幾何而不逋也故夫子取子路之無宿諾諾不  
宿獄不留矣唯大辟抵罪已定囚之以待秋冬緩死而不  
拂天之和氣肉刑未除劓刖宮墨有事刀鋸不可展溫  
和之化王者之慎慎以此爾夫豈流刑使卽三居扑刑旋施  
教誠縱證佐於南畝省簿書於掾史之謂哉月令非三代  
之書然其曰孟夏斷薄刑孟夏正陽之月也可以斷刑則

春夏之餘月可知矣魯恭之言有得有失言治理者不可  
不辨若阿囀之仁緩之乃以賊之以是爲順天而愛民豈  
理也哉哀矜清問則四時皆春不徒以其文也

和安之世漢所任將者任尙也軍安得不覆亂安得不極  
也尙嚴急而不知兵見於班超之說而猶不僅此章帝以  
來厯三世而國事屢變竇憲盛尙則爲憲之爪牙鄧騭興  
尙則爲騭之心膂憲敗賓客皆坐而尙自若西域叛亂北  
邊喪師漢法嚴矣而尙自若尙者一後世之債帥也平襄  
之敗死者八千餘人羌遂大盛而不可制尙鞠躬朔漢陽者  
三載坐視羌人之暴罰謫弗及復以待御史將兵於上黨

遷中郎將屯於三輔保祿位怙兵權而不懼尙何以得此哉其輦金帛以曲媚宮闈戚里者可知矣然則其嚴急也乃以漁獵吏士而爲結納之資也三輔殘國帑空并涼益土死不收徒不復羌人力盡而瓦解尙乃起而與鄧遵爭功以死天殛之也尙之誅也昧贓千萬以上憲與隲所爲護尙以稔其惡者在此矣憤帥之興其始於東漢乎而鄧隲之爲漢蠱賊可知矣□□聽政而內外交寇其所繇來亦可知矣

盜賊之興始於王莽之世莽篡天下相師以寇攘而抑劉崇翟義以草澤起義先之未足開盜賊窺天之徑也張伯

路一起而濱海九郡陷沒孫恩竇建德黃巢方臘李自成  
踵興而四海鼓動張伯路實爲之嚆矢焉三代之盛大權  
在天子也已而在諸侯矣已而在大夫矣已而在陪臣矣  
浸以下移而在庶人矣郡縣之天下諸侯無土大夫不世  
天子與庶人密邇自宰執以至守令所爲尊者榮富而已  
其他未有尊也十姓百家相雄長而莫能制豐凶不能必  
之於天貪廉不能必之於吏風會移之怨毒乘之歟然狂  
起抑將何法以弭之哉易曰天險不可升也謂上下之分  
相絕而無能陵也易國而郡縣易侯而守令矣安守令也  
有體嚴守令也有道守令之仁暴天子之所操也其次廷

臣之所衡也其次省方之使所糾也非百姓之所可與持也昧吏興上下蔽天子大臣弗能廉察激民之重怨而假民以告訐之權制守令之黜陟誅賞是進庶人而分天子之魁柄不肖之吏弱者偷合於民彊者相仇而競豪民視守令如雞豚可豢也可圈也可訐也斯可殺也而何弗可稱兵以脅天子也盜之所以死此而又興彼也易曰上天下澤履君子以辨上下定民志又曰小人而乘君子之器盜思奪之矣上下不辨民志不定乘君子之器者無大別於小人侯王豈有種哉人可稟岸以制守令之榮辱生死則人可侯王而抑可天子矣察吏不嚴於上而聽民之訟

上搖動人心而猶謂能達庶人之情非審於天網人紀者  
莫知其弊也陵夷天險而授之升立國者尙知所懲乎  
國帑屢空軍興不足不獲已而加賦於民病民矣而猶未  
甚也以官鬻錢穀而減其俸民病乃篤鄧后婦人米鹽銖  
綮之計也後人師之視爲兩利之術狂愚不可瘳矣萬不  
獲已而加賦也抑必有則吏方苦其不易徵未有能因而  
溢者也獺不飢不可使捕鷹不飢不可使逐誘取其錢穀  
於前而聽其取償於民咨予之以生計而委之以自掠雖  
欲懲貪詞先訥澀矣不能使徒步布衣草屨糲食策老餒  
幼以爲國效功也則烏能禁飢鷹餓獺之攫而無厭哉乃

人主且曰吾未嘗加賦以病民民如之何而不急公上下  
交怨而國必亡矣三代之世方百里之國君卿大夫士世  
食其祿下逮於胥史者數百人饗飧幣帛車乘芻糧奔走  
於四方而有餘一郡之大或兼數圻祿於朝者幾何人官  
於其地者幾何人守衛繕修公私交際所資於民者幾何  
事今之天下其薄取也視古而什之二三耳而古之民足  
今之民貧古之國有餘今之國不足下不在民上不在君  
居其閒者爲獯爲厲又使飢而發之攫金死於一門而粟  
賤於四海則終歲耕耘幸無水旱而道殣相望必矣無野  
人莫養君子上節宣野人之餘以養賢而使觀人朶頤以

惟攫取之巧拙爲貧富哉鬻官爵以賤之減俸以貧之吏  
旣賤而終不肯貧廉恥墜貧窶相迫避加賦之名蹈股削  
之實愚者之虐虐於暴君曾不自知其殃民民亦不知也  
怨不知所自起而益亟矣

漢之疆也北卻匈奴西收三十六國未數十年羌人一梗  
於河湟其志止於掠奪未有窺覬漢鼎之心也而轉徙五  
郡流離其民僮仆載道如孤豚之避猛虎悲哉誰爲謀國  
者而疆弱相質至此極也任尙債帥也鄧隲執袴也□□  
□□也□□尸於上執袴擅於廷債帥老於邊三者合而  
亡國之道備焉幸而不亡民之死也誰恤之哉天下未有



□□制命而執矜憤帥不興者也未有□□凝於上而干戈之慘不流於天下者也故曰鶴鳴于九臯聲聞于野氣相召禍相應而龐參之邪說始乘之以楔縮消生人之氣可不戒哉

鄧后爲鄧氏近親開邸第教學而躬自試之史稱之以爲美談漢武開博望苑而太子弄兵唐高開天策府選文士而宮門喋血天子之子且以召難況后族乎諺有之曰□□□□□□俗子通文則健訟詩書者君子所以調性情而忠孝小人所以啓小慧而悖逆者也故曰民可使繇之不可使知之不然三代王者豈以仁義禮樂召予斯人

而內不及於宮闈外不私於姻黨何爲也哉鄧后之約飭子弟也屢矣其辭若足觀者乃豫章唐檀告其太守曰方今外戚豪盛君道微弱則后之寵私親以素朝綱可知矣假之兵權復假之以文教先王經緯天下之大用一授之匪人國尙孰與立也言治者知兵權之不可旁落而不知文教之不可下移未知治道之綱也一道德同風俗教出於上之謂也

有其始之則已之也難是以君子慎乎其始之也西域通塞初無當於中國與匈奴之彊弱乃自張騫始之班超繼之中國震而矜之曰吾以斷匈奴之右臂於是匈奴亦因

而曰是可以爲吾右臂也迨安帝之世羌寇起隴西隔絕涼州幾棄匈奴於是因車師攻殺後部司馬又殺燉煌長史索班蓋至是而西域不可棄矣公卿乃始欲閉玉門絕西域置河西隴右剝牀及膚之禍於不恤班勇力爭其不可勇之策賢於其父超矣非勇之果賢也時異而勢不容已也乃超之出無撓之者而重撓勇勇策不用漢師不出匈奴寇抄不息沈氏因之而亂害極於鄯隴之庸悞而禍始於張騫之挑引故曰有其始之則已之也難也鄭於晉楚非果繫重輕而楚爭之晉因爭之晉爭之楚益爭之疲天下之兵力百餘年而兩皆無據高歡宇文泰之玉壁朱

友貞李存勗之楊劉一旦而以存亡繫之非其存亡之果  
繫也力盡於此而餘地皆虛徒使其土之民人蹂躪而殆  
無遺種皆始之者貽之孰有能包舉興亡勝敗之大而游  
心於餘地者乎易曰非所據而據焉身必危凡見可據者  
皆非據也游士炫其謀武人張其功後欲已之而不能故  
君子必慎乎其始之也

潁川杜根上書鄧后歸政安帝后怒撲殺之得蘇逃宐城  
山中爲酒家保積十五年后死乃出或問以何不投知故  
而白苦根言發露禍及親故智哉根乎何也親故之能託  
生死者不易得也非謂夫叛而執之也爲根之知交者應

不至此也好義之心苟不敵其私利之情則其氣先餒好義之心與私利之情相半卽不相半而不能忘其神必亂氣餒神亂耳目不能自主周旋卻顧示人以可疑則愈密而愈疏故義利交戰於胸者必交受其禍今有人於此而人或投之鄰里鄉黨不問焉者以適然聽之也唯大勇者爲能以適然處變不然則如酒家之本不覺而固適然者也非此而必不能矣嗚呼士不幸而處亂世不屈於邪而抑未可以死緩急固時有矣而可不慎所依乎好苛禮而不簡者恤小利而形於色者多疑而好謀者貌愿謹而勤小物者弔死問疾而多爲容者皆不可依者也

處士之徵而不受命者多矣或志過亢而不知時者也或  
名高而藏其拙者也或覲公孤師保之尊而躐級以不屑  
小官者也吾於薛包獨有取焉包以至行聞盡孝友飭門  
內之修而已自盡以求仁而無矯異驚人之節初未嘗規  
畫天人謂己有以利天下也漢徵之而拜侍中非其事也  
固非其志也包曰吾以盡吾門內之修天子知我徵我以  
風示天下而德不孤矣吾未嘗有匡濟之心而何用仕爲  
奚以知其然也以包之所爲皆循循乎父子兄弟之間非  
襄楷郎顗樊英窺測天人舍己而求諸人者比也而漢之  
授以侍中抑非其道侍中者出入諷議之臣也當安帝之

世外羌戎內盜賊外戚阿母宦寺交相煽搆此大人搏拊  
幹運見功之地而包之志略固不及此非天下有不可爲  
之時而非包敦篤修能所堪之任也則漢任之固不以其  
道矣善處包者使分司徒之教職而任之庠序則得矣不  
則使治一郡以興教化撫貧弱敷其潔己愛物之德治績  
懋焉如之何以侍中任之邪包之以死乞免度己量時之  
道允協矣豈志亢名高薄小位而覬公孤者類哉龍有潛  
也有見也有亢也孔子知不可而爲聖人之亢也伊呂之  
興大人之見也包之終隱君子之潛也潛者非必他日之  
見也道在潛終身潛焉可矣

安帝之不德豈至如昌邑王賀之荒悖哉立十五年矣鄧  
后寵平原王翼欲廢帝而立之杜根請帝親政而撲殺之  
視天位如置棊任其喜怒后之惡烈於呂武矣伊尹之放  
太甲未嘗他有援立示必反之也昌邑王之不可一日爲  
君霍光之不幸而又幸得宣帝之賢也且昌邑旣廢始求  
宣帝於民間未嘗豫拔宣帝而後廢昌邑也鄧后以婦人  
而輔以碌碌之鄧騭予奪在手唯意所授瀆大倫玩神器  
君子所必誅勿赦也鄧后死王聖李閔乘權而亂政繇安  
帝之不君可謂后之先識而志安社稷乎乃抑稽聖閔之  
得以繼帝而逞者誰使然也十五載見郊見廟之天子不



能自保大臣弗能救也小臣越位孤鳴而置之死也舍保母宦寺而誰依邪易位之僂辱與死接踵自非上哲反己自彊以潛消內讐則免己於死而固其位奚暇擇阿母宦寺之非而不以爲恩哉宦寺之終亡漢李閏江京始之也而竇鄧后之反激以延進之也

建元中守相坐賊禁錮二世劉愷以謂惡惡止其身春秋之義請除其禁持平之論也抑書曰刑亂國用重典從重以挽極重之勢施之亂國亦詎不可哉人之貪墨無厭罪罟不恤者豈其性然抑其習之浸淫者不能自拔也身爲王臣已離飢寒之苦而漁獵不已愚之不瘳何至於是斥

田疇珠玉飾第宅侈婚嫁潤及子孫姻亞族黨稱弗  
絕則相尚以迷雖身受歐刀而忘之矣妻妾子女環繞以  
相索始於獻笑中於垂泣終則怨謫交加而無一日得安  
於其室則自非卓然自立者且求微繆叢棘之不加於身  
勿雷他日之繫項伏鎖以偷免於旦夕也一行爲吏身爲  
子孫之僕隸驅使死辱而莫能逃乃伏法以還彼且握爵  
銜憲施施自得不復憶祖父之慘傷嗚呼孱柔者內偪於  
淫威甚於國憲亦大可矜也已故貪墨者其人也所以貪  
墨者其子孫也按本塞源施以禁錮之罰俾得謝入室之  
徧謫亦詎不可哉爲子孫者雖攤肥瘠立而士類弗齒卽

甚不肖忘情仕進然世胄恥與爲婚姻人士羞與爲朋侶  
守令可持法以相接治仇怨可抗顏以相報復則子孫先  
怵妻妾內憂庸謹之夫亦可藉手以寡怨於百姓則非但  
弭生民之誼賊且以旌別善類曲全中材而風俗亦繇之  
易矣惡惡止其身非此之謂也三代世祿士不憂貧雖貧  
而無爲子孫計者先世之澤不可自一人而斬也

治天下之綱紀非徒以其名也其實在其名雖易綱紀存  
焉其實在其名存獨爭其名奚益哉宰相之任唐虞之百  
揆合於一周之三公分於三其致治者非分合之爲之君  
正於上而任得其人也其合也位次於天子其分也職別

於專司然而難分必有統之者以合其分要因乎上所重而天下之權歸之天子乎以一心而躬親重任唯待贊襄則一也自漢以後名數易而權數移移之有得有失論者舉而歸功過於名夫豈其名哉操之者之失其實則末經以治也西漢置丞相而無實權移於大將軍故昌邑之廢楊敞委隨而生死莫能自必東漢立三公而無實權移於尚書故陳忠因災異策免三公上書力爭言選舉誅賞不當一絲尚書兩漢之異丞相合而三公分然其權之上移於將軍下移於尚書同也晉之中書監猶尚書也唐之三省猶三公也宋以參知分宰相之權南宋立左右相而移

權於平章永樂以降名爲分任九卿而權歸內閣或分或合或置或罷互相爲監而互相爲因若其所以或治或亂者非此也不擇則望輕心不孚則事礙天子不躬親而旁撓之者非外戚則宦寺也使大將軍而以德選則任大將軍可矣使尙書中書而以德進則任兩省可矣丞相三公其名也唐虞殷周不相師也懲權姦而分任於參知下移於內閣惡在參知內閣之不足以擅權而懷姦也上移於大將軍而僅以寵外戚下移於內閣而實以授宦寺豈其名之去之哉實去之耳天子不躬親而日與居者婢妾之與奄腐不此之防徒以虛名爭崇卑分合之得失亦未

矣爲公輔爭名不如爭實其爭實也爭權不如爭道非勵精親政而慎選有德皆末也榮或守心而翟方進賜死地震而陳褒策免其時獨無天子乎

周之進士也雖云鄉舉里選而必貢自諸侯與卿大夫非諸侯與卿大夫未有能達於天子者也已而大夫執政士之仕也必於大夫非大夫未有能達於諸侯者也漢之辟召自州郡公府非州郡未有能達於三公者也非三公未有能達於天子者也魏晉之選舉中正司九品之升降非中正未有能達於吏部者也隋設進士科而唐以下因之益以明經學究童子諸科與太學上舍之選舉校歲貢之

士逮及任子掾吏皆特達而登仕籍士無不可自達於天子而猶有依附權門失身匪類墮其名節者此尙何所委咎哉周末之政在大夫也聖門之賢亢志陋巷顏閔而已冉有之失身季氏子路之失身孔悝夫豈有康衢之可繇而趨邪徑哉士之仕也猶農夫之耕也無畇畇之隰則畝田雖确而不能已於蕭蓂故自隋以上清直端潔之士限以地迫以時失身於薦辟之匪人而不免於公論之彈射士之不幸也古之不今若也楊伯起之剛方而譖之者以鄧氏故吏爲其罪鄧隲辟震而震不能辭時使然也崔瑗之持正欲說閭顯立濟陰王不能見顯因陳禪以進說禪

不代達猶以顯累終身被斥環受顯之辟召而不能辭時  
使然也夫二子皆有求路不可奪之節而浮雲之翳白日  
滅輝自非螭龍屈蠖學顏閔而終潛德遭世末流亦將如  
之何哉後世貢舉法行舉主門生雖有不相忘之雅而一  
峯之於南陽念菴之於江陵抗疏劾之而不以爲嫌然且  
有別託蹊徑以呈身邪黨者使當晉漢以上其不爲郗慮  
賈充之躬任弑逆者幾何也覽伯起子玉之始終爲之深  
悼而士可以不恤其身哉

人之至不仁而欲賴以爲寵人之至不祥而欲附以爲援  
天下之至愚成天下之大惡終陷天下之大刑其能免乎



人主卽至愚且忍未有不欲其子爲天子者也其或有所廢者必有所立類皆私嬖妾寵庶孽而要亦授於其子安帝僅一子爾旁無嬖庶年甫十歲性猶婉順而惑於宦寺忍棄之鐘下而不恤己之無苗裔此誠古今之至不仁者矣奄人之崇惡也毒螫善類攻異己以行私爾卽至傷及元良如伊戾趙高之爲亦陰有攀附仍不舍其君之子而但逞於一時王聖江京樊豐之瑣瑣懷忿於王男邴吉而怨及國本吾君僅有一子而敢摧折以瀕於死亡此誠天下之至不祥者矣而耿寶無知喪心失志徇至不祥之人行至不仁之事惑古今至愚至忍之安帝賴其寵祿而附

險毒之奄妾以爲援帝死未寒寶先死於閭顯之手與聖  
豐而俱噓嗚呼不可與爲父子者必不可與爲君臣不可  
與爲君臣者必不可與爲朋友寶也顯也京也豐也歧首  
之蛇還自相噬而閭后亦因以斃按順帝雖納周舉之諫  
復朝同后而數日後聞  
后輒崩其死於見迫  
可知史諱言之耳不仁之尤不祥之甚未有能終日者  
也劉授劉熹馮石之爲三公緘默不言辱人賤行身逸鈇  
鉞而恥心蕩然矣

讀通鑑論卷七終